

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 29.11.2012 18.05 Uhr auf 94.0 bzw. 87,7

Moin, leev Toehörers,

woran hett dat legen, dat Kickers Emden lesd Freedag up egen Platz tegen Eintracht Nordhorn mit 1:4 unnergahn is? Dat is de Fraag, de sük völe Kickersfan stellt hebben. Harren de Spölers sük insgeheim al de Punkten up hör Konto schreven?

In de eerst Halvtied harr Kickers Emden Kansen für minnestens 4 Toren. Wat de Spölers dor för dat Tor van Nordhorn liggen laten denen, harr för 2 wunnene Spölen utreicht. Wat man den Kickersstörmers ankrieden mutt, is, dat se bi de schwaar un natt Grund neet mehr ut de 2. Rieg skoten hebben. De Ofwehr stunn seker, bit kört vör de Pausentee. Dor spölte man de Ball quer un toerügg. De Nordhorners gungen dor tüsken un kregen de Ball – un de kwamm toe de Spöler **Marcel Piesche** un de kunn de Ball toe de 1:0 för Nordhorn in `n Nett sketen.

Na de Wessel spölte Kickers Emden blot noch up dat Tor van Nordhorn. De Torwart hull aber bestens. Man in 63. Menüte harr he aber keen Kans, as BSV-Spöler **Ayaovi Bamezon** dree Tegenspölers stahn leet un toe dat 1:1 insketen dee.

Fiev Menüten later dat full dann in de Straafruum van Kickers een Spöler. De Linienrichter signaliseerte Elfmeter. Kickers un de Emder Toekiekers verstunnen de Welt neet mehr. **Florian Kamp** skoot seker toe dat 1:2 in. Nu muss Kickers natürelk noch mehr maken un wurr dordör achtern open.

Trainer **Yasin Turan** wesselt glik 3 Lü ut. Un al een Menüte later na de Elfmeter skoot **Tido Steffens** de Ball in `t Tor. Man de Schiri fleite Abseits. Weer `n Menüte later gung `n Koppball van **Tido Tuitjer** heel knapp an de Posten vörbi. Un dann kwamm dat enngültige Ut vör Kickers Emden. En fell Konter van de Gast kwann in de Middend, un Emdens Torwart **René Carstens** kwamm `n bietje toe laat. De Ball gung hoog un senkte sük in `t Tor. Weer blot twee Menüten later dann de enngültige Ko für Kickers Emden. **Rene Gerritzen** skoot dat 4:1 för Nordhorn.

Ja, leev Toehörers, so grausaam kann Foetball wesen. Dor is man overlegen un verlust dann doch hoog. Man de jung Kickersspölers sullen sük neet sovöl d`rut maken. Mörgen Abend kann de Mannskupp tegen TuS Pesem (Pewsum) bewiesen, wat se kann.

In de Fan-Forum van Kickers giff dat blot een Winner – un dat is Kickers Emden. So tippt Pyrofanatiker 3:1, Deichgraft 2:0 und Kicker15 2:1 för Kickers för 1.600 Toekiekers, dorvan blot 200 van Kickers. Na ja, dat is wall `n bietje overdreven. Man ik hoop ok, dat `n Bült mehr Toekiekers as in lesd Spölen um Klock 8 in dat Oostfreesland Stadion komen. Ik tipp up `n 2:0 för Kickers Emden.

So, nu noch `n kört Foetballwitz.

Tim Wieses Söhn geiht in de 3. Klass. Dat hett Tügnissen geven. As he in Huus ankummt, strahlt he over beid Ohren! Dor fragt Tim hum: „Na, wo is dien dann Tügnis utfallen?“ „Och“, seggt de Söhn, „heel goed! Ik hebb de Vertrag mit de 3. Klasse um een Jahr verlängert!“

Leev Toehörers van Radio Oostfreesland,
dat was dat weer maal för disse Week.

Ik hoop, Joe hett dat Plattdüütsk gefallen, denn mien Motto heet ja alltied,
plattdüütsk dürt - netto so as Kickers Emden – neet unnergahn.

Bit anner Maal
Joe
Erich Bolinius
ut Emden-Petjem (Petkum).